

aller dingen Schöpffer vnd Christo aller vnser erlöser dedicieret vnnnd zuge-  
schreiben sey.

Darumb wer begert dieses zuhaben / vnd das gehabte zuversten / vnd wer  
das verstandne vorbringen will / der beflisse sich erstlich seines heils / dar-  
nach des gemeinen / vnnnd des nutz der H. Christlichen Kirchen Gottes.  
Welcher nicht also wirt gestaltet sein / der soll wissen das er wahrhaftig von  
der H. Trinitet / vnnnd von Christo / dem wahrhaftigen vnnnd gerechten Rich-  
ter aller Lebendigen vnd Toden / hie zeitlich vnnnd dort ewiglich gar hefftig  
werde gestrafft vnd verdampt werden. Studier derhalben fleissig / vnd lige  
den besten Scribenten ob / dieweil je ein tag dem andern ein wort heraus lo-  
cket / ein Buch das ander erkleret / vnd ein nacht der andern etwas zu wissen  
thut. Versuchs / erfahrs ohn verdruss / bitte / klopf an / vnd umbgürte dich mit  
grosser inbrünstigkeit der gedult vnd liebe / wenn du zu der höchsten erfor-  
schung des Magisterij, vnd zu der erwünschten perfection vnd vollkommen-  
heit begerest zukommen. Vnd solt endlich in der tugent also geschaffen sein /  
wie du wilt das eigentlich der Lapis sein soll. Bistu vnvolkommen / so stre-  
be nach der gebürlichen vollkommenheit. Bistu stinckent vnd vnrein / so seu-  
bere vnd purgiere dich mit threnen : erhebe dich an sitten vnd tugenden / ziere  
vnd ferbe dich mit den Sacramentlichen genaden. Erhöhe dein gemüth /  
mach es durch contemplation der Himlischen subtil / vnnnd den Englischen  
Geistern gleichförmig / das es das faule corpus vnd geringe äschen möge  
lebendig / weiß / vnzerstörlich / vnsterblich vnnnd vnleidlich machen durch die  
Aufferstehung vnseres H. Erren I E S U C H R I S T I : vnnnd das sie durch  
Göttliche gesicht erleuchtet / vnd mit dem vnaussprechlichen Liecht begabet /  
eben dasselbe eigne corpus ; aber doch aufferwecket / mit dem schein vnd roten  
glanz der Ewigen Herzlichkeit erleuchten möge. Dann diese vnsterbliche  
Herzlichkeit / wirt auß dem verborgnen der Seelen in dem körper vber-  
schwenglich sein.

Dieser dingen formen vnnnd gestalten aller / hatt vnser aller berümbtester  
Stein volkomlich / vnd diese gegenwertige Allegoria zeigt heimlich dessel-  
ben ordnung an. Vnd diß sey dieses Buchs wahrhaftis Sigill /  
starker denn alle verschliessung / vnnnd schrecklicher /  
nutzlicher vnd Ehrlicher / dan alle jrdische  
Bittschier.

S O L I D E O G L O R I A .  
Amen.